

11. Regnum illud, juvene in exilium misso, et rege mortuo, abiit in prædam hostium, callide aliorum imbecillitatem explorantium.

12. Tum vero ministri, domino destituti, BHARATAM, apud matris suæ propinquum commorantem, advocari curabant per viros intimos, qui lacrymas suppresserant.

13. KAIKEYIS filius, cum patrem suum hoc modo mortuum esse comperisset, non solum a matre sua, sed etiam a dignitate regia se avertit.

14. Secutusque est RÁMAM cum exercitu, atque lacrymas fundens conspexit arbores, inter quas ille cum SUMITRIDA habitabat, ab anachoretis sibi indicatas.

15. Postquam illi, in *Chitrakútæ* sylva habitanti, narrasset, patrem in cælum abiisse, eum revocare studebat per LAKSHMIM, cujus felicitates non meræ reliquiæ erant.

16. Ipse enim, ante quam frater ejus major dignitatem regiam in matrimonium quasi duxisset, semet ipsum, si terræ regnum acciperet, ante illum matrimonium iniisse putavisset.

17. Quem cum amovere non posset, ut pater mortuus jusserat, petebat ab eo duas crepidas, quas regni quasi deas tutelares faceret.

18. Tum dimissus a fratre, qui hoc ei concesserat, non in urbem intravit, sed *Nandem* pagum profectus, fruebatur regno, quasi thesauro sibi commisso.

19. Ita fratris majoris amantissimus, remotus ab omni regnandi cupidine, ad matris facinus expiandum, pœnitentiam quasi agebat.

20. RÁMAS vero cum SÍTA in sylva victu agresti degens, tranquillus una cum fratre minore votum exsolvit juvenis, quod IKSHVÁKUIDÆ senes exsolvere solebant.

21. Aliquando aggressus ad arborem, quæ latitudine sua densam præbebat umbram, præ lassitudine aliquantulum dormiebat in SÍTÆ gremio.

22. Tunc avis, ab INDRA oriunda, unguibus suis SÍTÆ mammas dilaceravit, vilipendens quasi notas, quas illæ ex amati amplexibus ferebant.

23. RÁMAS, ab uxore pulchra e somno excitatus, graminis culmum jecit contra avem, quæ altero oculo amisso evolavit.